



FISKERIDIREKTORATET

Norges vassdrags- og energidirektorat
Postboks 5091 Majorstua
0301 OSLO

Adm.enhet: Forvalningsseksjonen i region Vest
Sakshandsamar: Ingerid Bjørkevoll
Telefon: 91393269
Vår referanse: 18/2528
Dykkar referanse: 201101044-57
Dato: 20.04.2018

Uttale til høyring av søknad om ny straumkabel til Storbritannia

Syner til brev av 07.02.2018 om søknad om ny straumkabel mellom Eidfjord kommune og Peterhead i Skottland.

Fiskeridirektoratet region Vest tykkjer det er gjort eit særskilt godt arbeid med konsekvensutgreiinga av tiltaket. Det er lagt opp til eit breitt samarbeid med fiskarar, fiskarlag og akvakulturselskap i arbeidet med kabelen. Vi ser derfor ikkje at tiltaket får store konsekvensar for fiske og biologisk mangfald.

Akvakulturselskapet må få god tid til å forberede seg til å flytte fortøyinger.

Føremål med planen

Selskapet NorthConnect KS har søkt om løyve til å byggje ein ny straumkabel mellom Sima i Eidfjord kommune og Peterhead i Skottland. Det er søkt om løyve til å byggje og drive anlegga, og løyve til å utveksle kraft med andre land.

NVE ønsker innspel på mellom anna følgjande:

- Kva meiner høyningsinstansane om tiltaket?
- Er konsekvensane godt nok utgreia?
- Forslag til justeringar av planane for å redusere moglege negative verknadar av tiltaket
- Forslag til vilkår for drift av kabelen

Rolle, ansvar og medverknad

Fiskeridirektoratet er styresmaktene sitt rådgjevande og utøvande organ innan fiskeri- og havbruksforvaltninga. I saker som får følgje for desse næringane, er det vårt ansvar å sikre deira interesser samstundes som vi skal sikre omsynet til det marine biologiske mangfaldet. Dei marine leve- og oppvekstområda, som til dømes gytefelt, er særleg viktige å ta vare på, slik at komande generasjonar også kan hauste frå havet.

Vår vurdering av tiltaket

Ein straumkabel ut heile Hardangerfjorden og Bømlafjorden og vidare ut i norsk fiskerisone vil kome i berøring med mange område for fiskeri og marint biologisk mangfald, og akvakulturanlegg med fortøyningssystem.

Fiskeri

Det vert lagt opp til eit tett samarbeid med fiskerinæringa. Dette er naudsynt for å redusere konfliktar og unngå skade på fiskereiskap.

Brislingsfiske

Brislingfiske går normalt føre seg mellom august og oktober i Hardangerfjorden. Det vert fiska i ulike område i Hardangerfjorden frå år til år og somme år er der ikkje fiske etter brisling i det heile tatt. Det er derfor vanskeleg å uttale seg bestemt om kva område fiske går føre seg i, før sesongen er der. Dersom det ikkje er fiske etter brisling i Hardangerfjorden vil det sjølvsagt ikkje vere naudsynt å ta omsyn til dette fiske. Vi anbefaler at tiltakshavar samarbeider med Fiskarlaget Vest/Sør-Norges Notfiskarlag, lokale fiskarlag og fiskarar slik at ein kan finne den beste løysninga for begge partar.

Omsyn som må takast i samband med fiske

I fagutgreiinga om konsekvensane på fiskeri og akvakultur er det gjort ei grundig utgreiing av kva fiskeri som arbeidet kan kome i kontakt med og kva konsekvensar legging og drift av kabel kan få. På møte den 17. april med representant frå NorthConnect fekk vi også forståing for at dei har, og har hatt, stor fokus på å kartlegge fiske som skjer i området, og å unngå konflikt med fiskarar.

Fiskeridirektoratet region Vest ser på godt og tett samarbeid med fiskarlag og fiskarar, samt at desse får god informasjon før og under legginga av kabelen, som det viktigaste avbøtande tiltaket.

Kabelen vil bli greven ned og dekka med masser som gjer at fiskarane kan tråle over traseen. Det vil derfor ikkje vere noko problem at kabelen går i rekefelt etter at han er ferdig greven ned. Anker frå båtar brukta i lysfiske vil heller ikkje vere noko problem i og med at desse er

for små til å gjere skade på kabelen. Når kabelen skal dekkast av stein vil desse bli lagt på ein slik måte og vere av ein slik storleik at massane vil vere overtrålbare.

Kabelen skal registrerast på sjøkart slik at fiskarar og andre kan sjå nøyaktig kor denne går.

Fiskeridirektoratet region Vest kan ikkje ut i frå dette sjå at tiltaket vil vere til stort hinder for fiske.

Akvakultur

Vi ser at tiltakshavar har hatt eit samarbeid med akvakulturnæringa for å kartlegge fortøyningar. Dette er vi einige om er heilt naudsynt fordi fortøyningane frå akvakulturanleggja er lange og lette å kome bort i, og det må ikkje skje.

I møte av 17. april fekk vi vite at NorthConnect vil samarbeide med selskap som har anlegg med fortøyningar som kjem ut i eller kryssar traseen for kabelen slik at desse kan flyttast når kabelen skal leggast ut. Det vil vere problematisk å flytte fortøyningane når anlegga er fulle av fisk så det må gjerast når anlegga er brakklagde. Dette vil krevje ei stor grad av samarbeid og koordinering av fleire akvakultur selskap, NorthConnect og selskapa som skal legge kabelen. Planlegginga av dette arbeidet må derfor skje i god tid før arbeidet tek til slik at alle brikkane kan kome på plass til rett tid.

Det viktigaste avbøtande tiltaket i samband med akvakultur er også samarbeid med, og god informasjon til akvakulturnæringa. Dette er det god fokus på, noko som både er naudsynt og særskilt viktig for å unngå skade på anlegg og fortøyningar.

Marint biologisk mangfald

NorthConnect har hatt stor fokus også på marint biologisk mangfald og sa i møte 17. april at dei har undersøkt om der er viktige marine naturtypar i traseen til kabelen.

Det er ikkje registrert gyteområde i traseen til kabelen. Der dei kan, har NorthConnect lagt kabelen utanfor område med korallar, som for eksempel i kandidatområde til marin verneplan som ligg mellom Stord, Tysnes og Kvinnherad. Alle store tareførekomstar som er registrert i utløpet til Hardangerfjorden er ikkje i traseen for kabelen.

Vi kan ikkje ut frå dette sjå at tiltaket får store konsekvensar for marint biologisk mangfald.

Konsekvensutgreiing, forslag til endringar og vilkår

Fiskeridirektoratet region Vest tykkjer det er gjort eit særskilt grundig arbeid med utgreiing av konsekvensar av tiltaket og det er søkt å redusere konsekvensane mest mogeleg.

NorthConnect har gjort det klart av dei vil følgje dette opp og dei legg opp til ein stor grad av samarbeid med fiskarar, fiskarlag og akvakulturselskap. Derfor ser vi ikkje noko grunn til å kome med forslag til endringar og vilkår, og vi tykkjer konsekvensane er godt nok utgreia.

For spørsmål knytt til vår uttale kan de ta kontakt med sakshandsamar.

Med helsing

Leni Marie Lisæter
seksjonssjef

Ingerid Bjørkevoll
rådgiver

Brevet er godkjent elektronisk og vert sendt utan handskriven underskrift

Mottakarliste:

Norges vassdrags- og
energidirektorat

Postboks 5091
Majorstua

0301 OSLO

Kopi til:

Fiskarlaget Vest

Slottsgaten 3 5003 BERGEN

Fylkesmannen i Hordaland

Postboks 7310 5020 BERGEN

Hordaland fylkeskommune

Postboks 7900 5020 BERGEN

Kystverket Avd Hovedkontor

Postboks 1502 6025 ÅLESUND

Haugesund

Postboks 603 4606 KRISTIANSAND

Northconnect Ks

Lundsiden S